

Sistema Atensaun no Responde Sedu (atRes) ho apoiu fundu kiik husi United Nations Office for Project Services (UNOPS) and Peace building Support Office (PBSO) no Gabinete Apoiu Sociedade Sivil (sigla Portugés: GASC) husi Governu kontinua implementa servisu monitorizasaun ba insidente violénsia ne'ebé akontese iha periodu Abril-Jullu 2024. Sistema ne'e hanesan baibain, parseria ho rede monitorizador iha baze atu halibur informasaun kona-ba insidente violénsia sira. Insidente ne'ebé rekolla ona regulármente haruka ba koordinador munisipiu sira hodi rejistu iha sistema baze dadus nasional ho sistema online. Jestor baze de dadus iha nasional uza dadus ne'e hodi halo verifikasaun ikus no haruka ba jestor programa hodi analiza ba kauza sira ne'ebé hamosu insidente violénsia ne'ebé akontese. Ba maluk sira ne'ebé interese ba dadus insidente no atividade prevensaun konfliktu no harii dame iha comunidade ne'ebé akontese iha Timor-Leste, bele asesu iha [www.atres.belun.tl](http://www.atres.belun.tl)

Revista situasaun periodu ne'e, kobre Munisipiu Baukau, Bobonaro, Covalima, Dili, no Vikeke, ho postu administrativu 13 mak hanesan, Postu Administrativu Baukau Vila, Quelikai, Bobonaro vila, Maliana, Cristo Rei, Dom Aleixo, Nain Feto, Maukatar, Suai, Zumalai, Ossu, Uatulari no Vikeke. Parseiru monitorizador hamutuk na'in 7 (mane 4, feto 3), hamutuk ho koordinador munisipiu na'in 6 (Mane 3 feto 3) mak servisu hamutuk ho monitorizador sira iha area kobertura koleasaun dadus nian. Dadus insidente iha Munisipiu 5 periodu ne'e deskreve tuir mai:

**ASUNTU NE'EBÉ PRESIZA TAU ATENSAUN**

- ▶ **Violensia domestika 42**
- ▶ **Insidente violensia tanba disputa rai 13**
- ▶ **Insidente ho envolvimentu Grupo Arte Marsiais 10**
- ▶ **Violensia ho karakter seksuál iha 4**

Munisipiu	Total Insidente
Baukau	38
Bobonaro	26
Covalima	32
Dili	27
Vikeke	33
<b>Grand Total</b>	<b>156</b>

**INSIDENTE VIOLÉNSIA IHA, BAUKAU, BOBONARO, COVALIMA, DILI NO VIKEKE, PERIODU ABRIL-JULLU 2024**

Belun ho nia Sistema atRes iha periodu ne'e ho apoiu parseiru husi UNOPS-PBSO no GASC, kontinua rekolla dadus insidente iha munisipiu 5 ho total insidente hamutuk 156 ho numeru insidente as mak Baukau no Vikeke, maske nune'e la dun iha diferenza makaas ho munisipiu tolu seluk. Haree husi jéneru perpetrador nian, husi total insidente 156, envolvimentu perpetrador mane hamutuk 134, feto hamutuk 13 envolvimentu mane no feto hamutuk 5, envolvimentu ema deskoñesidu hamutuk 4.

Enkuantu vitima iha insidente sira ne'e, mane 80, feto 68, no vitima feto no mane hamutuk 5 no deskoñesidu 2 no ema ho defisiensia 1. Perpetrador ne'ebé envolve iha insidente sira iha periodu ne'e, mai husi status sosial ka pozisaun oioin iha sociedade mak hanesan dezempregu, toos nain, estudante, membru familia hela iha uma hanesan, membru GAM, membru familia hela iha uma

seluk, ofisial governu, F-FDTL, PNTL, mestre, refujiadu, viziñu, seguransa pesoál no funsionariu NGO ho numeru envolvimentu iha insidente hanesan hatudu iha tabela tuir mai:

Dezempregu	39	Ofisial governu-FFDTL_PNTL	3
Toos nain	39	Refujiadu	2
La hatene	29	Viziñu	2
Estudante	10	Mestre	1
Familia uma hanesan	10	Seguransa pesoal	1
Membru GAM	10	Sosiedade sivil	1
Membru familia hela iha uma seluk	9		

Sasan ka maneira ne'ebé uza iha insidente ne'e mak isin lolon (ez. liman, ain, nehan nss) hamutuk iha insidente 74, istori malun, haksesuk malun, deskute malun nsst iha insidente 55 ameasa liafuan ka fiziku iha insidente 31, uza fatuk iha insidente 12, uza ai-dona ka besi kanu iha insidente 12, sasan sira seluk iha 14, no diman iha insidente ida. Haree husi numeru total sasan ka meus ne'ebé uza iha insidente violensia hatudu katak iha kada insidente perpetrador sira uza meus liu husi ida ka oioin (laos meus ida de'it iha kada insidente).

Maneira ne'ebé uza barak liu husi perpetrador wainhira komete violensia inklui: agresaun fiziku uza iha insidente 62, deskute malun no maus tratus iha uma laran (violensia domestika) iha insidente 42, atake/ameasa verbál iha insidente 33, naok iha insidente 8, estraga propriedade iha insidente 3, vandalizmu iha insidente 3, esplorasau seksuál iha insidente 2, suisidiu iha 2, violensia seksuál iha 2, no trafiku umanu iha insidente 1.

Kauza husi insidente sira iha periodu ne'e maioria mosu tanba deskontentamentu ba hahalok no asaun oioin entre parte sira iha insidente 105, kauza husi deskonfia malun entre parte sira iha insidente 19, tanba lanu iha insidente 14, tanba disputa rai baliza, rai ba uma no rai ba toos hamutuk insdente 13, tanba de'it animal tama toos no estraga ai horis iha toos laran iha insidente 4, tanba osan no tanba ximentu, ida-idak iha insidente 3, tanba falta edukasaun, tanba hadau malun rekursu natural bee no estraga propriedade ida-idak iha insidente 1. Insidente ne'ebé la hatene nia kauza loloos iha insidente 12.

Impaktu husi insidente iha periodu ida ne'e, ema mate hamutuk nain 3 (mane 1, feto 2) husi postu administrativu 2 Nain Feto no Ossu. Ema hetan kanek todan hamutuk nain 18 (mane 1, feto 17) husi postu administrativu 4 iha Cristo Rei no K

Quelikai, Zumalai no Suai. Ema hetan kanek kmaan hamutuk nain 77 (Mane 37, Feto 40 husi Baukau 29 (Mane 16, feto 13), Bobonaro 2 (Mane 1, feto 1), Cristo Rei mane 1, Dom Aleixo mane 2, Quelikai nain 5 (mane 4, feto 1), Maliana 10 (mane 9, feto 1), Suai feto nain 2, Uatulari nain 9 (mane 3, feto 6), Vikeke nain 2 (mane 1, feto 1) no Zumalai feto nain 15. Ema sente la seguru no halai husi fatin insidente iha 3, Uma hetan estragus iha 12 (6 iha Dom Aleixo, 5 iha Quelikai no 1 iha Suai). Uma privadu 3 mak aat, uma rahun iha 31 Dom Aleixo 27, Maliana 3 no Zumalai 1. Uma privadu 4 mak rahun mos iha Dom Aleixo 2, Maliana 1, Zumalai 1. Viatura 9 mak at, husi 9 ne'e 1 kareta governu no 3 seluk kareta privadu.

Husi insidente 156 ne'e, iha insidente 59 mak monitorizador ka koordinador munisipiu atRes hanoin katak, insidente violénsia ne'e bele kontinua ka akontese fila fali, uainhira la tau atensaun ho didi'ak, entaun, odiu vingansa sei kontinua eziste entre parte sira, nune'e bele hamosu insidente iha tempu oin.

### INSIDENTE VIOLENSIA DOMESTIKA 42 IHA BAUKAU, VIKEKE, COVALIMA, BOBONARO NO DILI

Violénsia doméstika iha periodu ne'e akontese iha Munisipiu Baukau 18, Vikeke 10, Covalima 8, Bobonaro iha 4 no Dili 2. Barak liu akontese entre parseiru intimu iha 31 (laen ba fen 29, fen ba laen 2), entre membru familia hela iha uma hanesan iha 4, maun ba alin iha 3. Aman ba oan iha 2 no oan baa man iha 1. Kauza husi violénsia ne'ebé akontese dala barak tanba insatisfasaun ba hahalok entre parte sira hanesan deskonfia malun komete adulteiru, problema ekonomia uma laran, disputa rai, lanu, tentativa ba violasaun seksuál, kazu abandona no tanba diskordansia iha asuntu kultural. Husi insidente 42 ne'e, insidente iha 4 mak intervein husi parte Polísia Nasionál Timor-Leste (PNTL), barak liu intervein husi membru familia husi perpetrador no vitima hamutuk 18, 3 intervein husi viziñu, autor relijiozu hamutuk ho viziñu intervein iha insidente 1, iha insidente 16 mak la hatene ka laiha ema ida mak responde ka intervein iha insidente ne'e. Fatores kontribui ba insidente violénsia hirak ne'e mak sentimentu xiumentu, deskonfiansa irespeitu, osan no odiu vingansa entre parte sira.

### INSIDENTE VIOLENSIA TANBA DISPUTA RAI IHA 13

Insidente violensia tanba asuntu rai no propriedade iha periodu ne'e hamutuk insidente 13, insidente 6 mak disputa rai ba uma no 7 mak disputa rai ba toos, akontese iha munisipiu Bobonaru insidente 4, Covalima insidente 3, Dili insidente 3, Vikeke insidente 2 no Baukau insidente 1.

Maioria mane mak hanesan perpetrador iha insidente 9, perpetrador feto iha insidente 2 enkuantu insidente rua seluk perpetrador mane no feto. Vitima iha disputa rai sira ne'e mane 3, feto 7, vitima mane ho feto iha 3. Husi insidente 13 ne'e, insidente 6 mak intervein husi membru familia husi perpetrador novitima, PNTL intervein iha insidente ida, viziñu iha insidente 1, membru konsellu suku responde iha insidente 1, lia nain laos membru konsellu suku intervein iha insidente 1, ofisial governu iha insidente ida no insidente 2 seluk la iha ema ida mak intervein. mak hetan intervensaun husi membru konsellu suku no PNTL, insidente 7 seluk, membru konsellu suku, viziñu no membru familia husi perpetrador no vitima mak intervein enkuantu insidente 1 seluk, la iha ema ida mak intervein.

### INSIDENTE 10 HO ENVOJMENTU GAM IHA

Insidente ho envolvimentu GAM iha periodu ne'e hamutuk insidente 10, akontese iha Dili insidente 6, Bobonaro 2, Baukau 1 no Covalima 1. Fator ne'ebé kontribui ba akontesimentu insidente sira ne'e, barak liu tanba de'it xiumentu sosial no la gosta malun entre grupu. Husi


insidente 10 ne'e PNTL intervein iha insidente 9, inklui membru familia husi perpetrador no vitima, viziñu, no NGO. Iha insidente ida iha Bobonaro mak la iha ema ida mak intervein.





### ESPLORASAUN SEKSSUÁL 2, VIOLASAUN SEKSSUÁL BA MENOR IDADE 2 NO ABUZU SEKSSUÁL 1

Esplorasaun seksuál no violasaun seksuál ba menor idade iha periodu ne'e iha insidente 2, violasaun seksuál ba menor iha 2 no abuzu seksuál 1, akontese iha munisipiu Covalima no Vikeke. Insidente hirak ne'e akontese tanba falta edukasaun, tanba mane la responsabiliza ba gravidez feto ni'an husi sira nia relasaun tanba familia nia envolvimentu, ida tanba mane perpetrador la responsabiliza tanba nia iha fen, insidente ida akontese tanba perpetrador uza relasaun romantiku ba explorasaun osan no sasan ba vitima no ida seluk buka pulsa.


Iha aspetu barak mak jerálmente influensia hahalok seksuál husi perpetrador sira hanesan ezemplu, fator biolójiku, psikolójiku, influensia sosial no kultural, fator envairamentu hanesan asesu ba edukasaun, bele mos esperiensia pesoál. Mane mos konsidera feto fraku no la iha korajen atu defende nia an rasik, nune'e nia sente nia bele domina. Husi insidente 5 ne'ebé akontese, PNTL no NGO intervein iha insidente 2, mmembru familia husi perpetrador no vitima intervein iha insidente 1, membru konsellu intervein iha insidente 1 enkuantu insidente ida la iha ema ida mak intervein.

### GRAFIKU KARATERÍSTIKA JERÁL INSIDENTE







### EMA NE'EBÉ RESPONDE KA HAKALMA INSIDENTE



### FATOR NE'EBÉ HAMOSU INSIDENTE



### IMPAKTU HUSI INSIDENTE



## ATIVIDADE PREVENSAUN KONFLITU NO HARII DAME

Programa Saude Reprodutiva no Seksuál Integradu ((Sigla Inglés: ISRH) ne'ebé nia objetivu atu Hasae Konsiensia ba Komunidade mak implementa atividade desiminasau ba inan isin rua, banin fetu no mane no komunidade ne'ebé foin forma uma kain no desiminasau nee mak Saude Reprodutiva no seksuál integradu nomos Apoiu vitima asesu ba justisa formál, implementa husi Abril too Jullu 2024 iha munisipiu:



1. Munisipiu Ermera iha suku Lauila ho total partisipante 21 (fetu 14 no mane 7), suku Remerhei ho total Partisipante 33 (fetu 25 no mane 8), suku Estadau ho total Partisipante 22 (fetu 18 no mane 4), suku Lequimea ho total Partisipante 23 (fetu 20 - inan isin rua hamutuk na'in 13 no mane 3), Suku Mertuto ho total Partisipante 24 (fetu 20 - inan isin rua hamutuk na'in 8 no mane 4)
2. RAEOA iha Suku Malelat ho total Partisipante 33 (fetu 19 no mane 14-inklui EhD 1) no Suku Abani ho total Partisipante 29 (fetu 27 - inan isin rua hamutuk na'in 11 no mane 2)

Programa nee hetan apoiu mai husi UNFPA.



Programa ne'e hetan apoiu Finanseiru husi Gabinete Apoiu Sosiedade Sivil iha Mahon Vise Primeiru Ministru Koordinador ba Asuntu Sosial, iha tinan fiskal Periodu husi Maiu – Outubru 2024. Programa ne'e iha implementa iha Munisipiu tolu (3) Baukau, Covalima ho Vikeke.

### Objetivu:

Atu hakbiit Fetu, Joven Inkluzivu no komunidade iha abilidade ba sustentabilidade Ekonómia,

kapasidade prevene Konflitu no violénsia hodi kontribui ba Justisa Jéneru no desenvolvimento iha Timor-Leste.

Belun hala'o Monitorizasaun dadus insidente iha Munisipiu 5 (Baukau, Covalima, Bobonaro, Dili no iha Munisipiu Vikeke), iha Postu Administrativa 14 (Postu Baukau, Quelekai, Suai, Zumalai, Maucatar Vikeke, Ossu, Uatucarbau, Maliana, Bobonaro, Balibo, Xristu Rei, Dom Aleixo no Postu Administrativa Nain Fetu) no iha Suku hamutuk 121 hahu husi fulan Maiu to'o fulan Jullu 2024, total insidente hamutuk 119. Fundus ba atividades monitorizasaun Insidente husi GASC kobre ba Munisipiu 3, Postu Adm 6 no fundus husi UNOPS kobre ba Munisipiu 3, Postu Administrativu 8).

Husi fulan Maiu to'o fulan Jullu 2024, ONG Belun hamutuk ho Defensória Públiku iha Judisiál Baukau no iha Judisiál Covalima, fasilita tiha ona mediasaun hamutuk 10 (Fasilita mediasaun 8 iha Judisiál Baukau no 2 iha Judisiál Covalima). Husi fasilita mediasaun 10 (kazu disputa rai 2, kazu Indemizasaun 4, kazu desfamasau 3 no kazu Revindikasaun propriedade 1) ne'e, kazu 6 (Disputa rai 1, kazu devorsiu 1, kazu desfamasau 2, no kazu indemizasaun 2) mak iha solusaun no asina karta akordu, no kazu 3 kontinua mediasaun iha etapa tuir mai.

## KONA-BA REVISTA NE'E

Revista situasaun ne'e relata kona-ba asuntu xavi relasiona ho insidente violénsia no tendensia husi dadus monitorizasaun liuhusi Sistema Atensaun no Responde Sedu (atRes) Timor-Leste durante Abril-Jullu 2024 iha Munisipiu, Baukau, Bobonaro, Covalima, Dili, no Vikeke. Tuir lolo'os revista ne'e publika iha Fulan Agostu, maibé tanba kestaun tekniku balun, ikus mai implika mos ba publikasaun ne'ebé tarde. Atividade sira ne'e hetan apoiu fundu husi UNOPS-PBSO no GASC.

## Informasaun kle'an liu iha [www.atres.belun.tl](http://www.atres.belun.tl)

Atu hetan informasaun kléan liutan, favor kontaktu:

**Luis da Costa Ximenes**, Diretór Belun, [luis.belun@gmail.com](mailto:luis.belun@gmail.com)

**Romaldo Caetano**, Jestór Programa atRes: [romaldo.belun@gmail.com](mailto:romaldo.belun@gmail.com)